

Dursch dick unn dinn

Isch honn friher e gudd, lieb Freindin gehadd.
Geschwischder wäre ma, honn se all gesahd.
Als Wunne-Määde ware ma iwwaall bekonnd.
Obwohl mir nitt mitennonner verwonnd,
honn mir uns aarisch gudd geglisch:
Rodblonde Hoor, die Bagge dick unn frisch,
e bissje fresch, munda unn immer froh
sinn mir zwei dursch Dudwiller gezoh.

Mit 14 war die Schulzeid ze Enn.
E Lehrstell ze grien war aussichtslos gewäään.
Sollde ma doo sitze unn uff Aawet waade?
„Ab in die Haushaldsschul, die konn eisch nix schade!“
Die Eldre honn's jo gudd nur gemennd.
Unn Widdaredde, die hadd ma domols nitt kennnd.

Mir ware zwei Honnesse, gudd proportionniert,
awwer die Punde honn uns doch schun scheniert.
So honn mir hin unn här iwwaleed,
wie ma ruck-zuck ronk unn schlönk werre dääd.
Mir hodde geheerd, wemma vill Saures dääd esse,
kinnd ma ball de Spegg vagesse.
Nitt meh wie das! Mir honn Rhabarwer geklaud
unn denne morjens uffem Schulwää gekaud.
Das hädd aach beinächschd geklabbd. Wär nur de Kohldamp nitt
gewäään!

Es muss doch noch ebbes onneres genn!
Nadierlisch! Beweschung, das is doch klar.
Jetzt sinn mir schwimme gong jede Dah.
Unn was war de Erforsch? Noch meh Abbedidd,
Sunnebrond unn die Nas vull Summersprosse hamma gridd.
Letschdendisch honn mir aach das gelass;
Mir ware hald e kräfdischi Rass!

Dann war die Zeid der Organisation ohngesahd:
Jedes vun uns hadd e Jungmädscheschar gehadd.
Aach de BDM – Dienschd war oft rischdisch scheen;
Doo honn mir e bissje schnerre kinne gehn.

Awwer was ma donn honn erausgefunn!
Es Rauche is groß in Mode kumm.
Mir heere, Goddfreinds Irma raucht schun long
unn is in de Park midde Buwe gong!
Das Rauche kinnd ma jo aach mo brobiere.
Doo kann ääm jo eischendlisch nitt vill passiere.
Nur so zum Spass, es war zwar aarisch riskand,
das wääß jeder, der unsre Alde gekannd.
Mir ware jo (nodgedrunge!) immer aarisch brav,
sinn immer scheen in de Fuhr gelaaf.
Doch jetzt käm's uff e Vasuch mol ohn.
Nur, wie kumme ma on die Zigaredde droon?
„Mei Babba rauchd Lasso, do holl isch mol zwei
unn du bringschd vun eisch es Fixfeier bei!“
Unn passiere däät's am beschde uff da Windabachstrebb,
dort is es dungel, dort hadd's noch kenn Londonder gebb.
Doo honn mir zesamme gesitzd unn geschmauchd:
Es Anneliese hadd meh gekaud wie gerauchd.
Unn wie mir donn ferdisch ware mit Paffe,
honn mir uns dabba hemm misse schaffe.
Uns war's gar nitt gudd, nitt vorre, nitt hinne!
Nää, om Rauche kunnde mir nix finne.
Aach später im Kriesch honn isch moi Raucherkaad
fa Kääs getauschd; Hunger honn isch immer gehadd.

Scheen war aach die Boomstammzeid.
Unser Kuche war beliebd, wirklich, weid unn breid.
Äämol, es war on Oschedere gewäään
honn mir fa de Allment gebagg, so Stigga 10.
Bei de Wunne-Mamme gebagg, in de Wäschkisch ganierd,
die Buddakräüm vun Hond scheen schaumisch gerierd

Unn wemma hemm sinn dursch die Klabbergass,
do honn mir die Kellerläädscher zuschnabbe gelass;
die Eisemännja, die se hoch gehall,
hamma runna gestubbsd; dass war e Knall!
De Fritsch Dolle hadd se dofor vun seiner Oma gefong.
Äämol sinn aach mir faschd uff de Leim ihr gong.
Doo hadd se owwe hinna de Läade gespitzd.
Wie simma doo awwer um de Egge geflitzd!
Gell, das misse all neidlos gestehn:
im Abhaue war isch immer es Schnellschd gewäään.

Oje, de ald Vadda Schmeer honn mir mol bees gemachd,
weil mir Sunndachs Morjens honn iwwa sei Schnurresbind gelachd.

Unn die ään Hexenaachd – das war e Blamaasch –
doo sinn mir fortgelaaf vor unser eischen Kurraasch!

Dann de Summa, wie ma noh Gresaubach ware,
middem Rad, mit was honn mir aach sunschd solle fahre!
De Bersch simma runna geschnurrd; es war e Meischderstigg!
De große Mischdhauf unne war em Annelies sei Gligg!
Isch honn mir es Lache nitt kinne vabeiße.
Doo war's awwer wiedisch, hädd misch kinne vareiße!

Es Fränzje, mei Kusing, hadd domols Spass an meiner Freindin gehadd.
De Dummkobb hadd sisch awwer nitt getraud
unn's vill ze spääd ershd gesahd.

Unn donn kam der ungliggesliche Kriesch.
Der hadd alles ausenonner geriss
unn uns um unser Juchend beschiss.

Frieher war's scheen, doch fa jetzt isses genuch.
Isch kinnd schreiwe vun domols e digges Buch.
Awwer nochemol 18? Nää! Isch dääd wedde,
dass ma alles grad widda so mache dääde.
Drum stehn ma zu unserm Alder, sinn zefridde unn froh
unn mache noch e paar Jährcher weider so!

